

Apesar di e retonan

Fundacion C.V.A. Aruba ta mira atras riba un aña exitoso

ORANJESTAD- Fundacion C.V.A. Aruba ta wak atras riba un Aña 2011 cu basta reto pero tambe cu algun logro importante.

Manera mayoria Fundacion sin fin di lucro (non-profit), 2011 a resulta un aña di retonan grandi, como cu donacionnan tawata limita y nos Fundacion sigur a sinti efecto di esaki, como cu Fundacion C.V.A. Aruba no ta ricibi subsidio ni donacion fiho.

Apesar di esaki, Fundacion C.V.A. Aruba e aña aki atrobe a tene charla den varios bario, a organisa un evento di screening pa riesgo di 'stroke' y a participa

na diferente evento di conscientisacion di salud.

Tambe Fundacion C.V.A. Aruba a organisa na Mei un encuentro pa sobreviviente di 'stroke' y na ciudadonan/famia y a organisa tambe na October un mainta special pa esunnan cu ta forma parti di e Grupo di Sosten di Sobrevivientenan di Stroke.

Fundacion C.V.A. Aruba su meta ta pa conscientisa riba e enfermedad cerebral vascular accident (cva/stroke), cu ta afecta tanto hende muhe y hende homber na Aruba. Banda di focus riba prevencion, Fundacion C.V.A. Aruba tambe ta asisti famia di esunnan cu a su-

fri un stroke cu informacion, conseho y guia.

Durante e aña cu ta pasando, Fundacion C.V.A. Aruba a lansa su Website y tambe su Facebook Page, riba cual tambe por haya informacion riba e Fundacion y riba e enfermedad di Stroke.

Pesey tambe, ora mira bek riba 2011, Fundacion C.V.A. Aruba no por keda sin gradici su boluntarionan y tur esunnan cu a coopera cu nos den un of otro forma durante 2011.

Finalmente Fundacion C.V.A. Aruba ta desea henter pueblo di Aruba Feliz Pasco y un prospero 2012 yena cu salud y dicha. □